

求恕齋
叢書

雪橋詩話

三

雪橋詩話卷第三

遼陽楊鍾義撰集

吳興劉承幹參校

三包六竇唐人以爲美譚彭禹峰子六人始起始騫始超始奮始搏皆能詩奮字中郎搏字直上漁洋寄鄧州彭中郎直上兄弟詩舊識中郎美新高第五名中原傳二妙故國繼三甥阜帽遼東客青山宛葉情羨君名父子家本冠軍城直上戊辰館選官至閣學禹峰女亦能詩漁洋嘗序其蝶龕集

施愚山序李漁邨燕臺詩云山左舊游舉進士能詩者

既有田子綸曹升六王仲威李子與卽墨楊子六吉又
同召至都下不爲不遇今數來論詩日有聞吾喜諸子
之足張吾軍也其贈六吉序云楊生還吉志潔而行芳
才茂而年盛余爲補諸生冠軍鐫其文著有味道堂詩
秋夜贈巢征伯兄云游子久不歸留滯在何方白露忽
已屆夜雨凝清霜不知霜早晚但見草木黃南國收芋
栗臨崖割蜜房及此歲未暮好治我衣裳於物雖少取
與世幸無妨俯仰體自適邱壑性難忘漢陰有父老策
材話義皇

宋徽宗畫禽鳥多以漆點睛高出紙上嘗命待詔畫孔

雀獨以左足先上爲羣工所不察滄州戴巖舉明說題
徽宗畫鷹云雪後天高雙羽輕金晴斜瞬暮雲平誰知
良嶽山頭燕風雨年年罵蔡京陳其年徽宗畫鷹歌云
繁臺當日秋鮮新臂鷹子弟紅領巾綠鞢雪鋌光如銀
下視狐兔皆輕塵無情汴水堪悲咤一出宮門淚珠瀉
數傳可惜趙王孫不畫奇鷹畫凡馬趙意林藏有徽宗
鸛鵲圖沈疇士厲太鴻均有題詠錢曉徵有徽宗畫龍
歌迂卅川畫船錄記有水墨鴛鴦揚大瓢謂徽宗尙人
物花鳥故黃筌父子收至六百七十餘幅徐熙二百四
十餘幅而山水寥寥若後世所傳名家山水皆高宗所

收

宣城梅耦長號雪坪康熙辛酉舉于鄉爲竹垞所得士
善八分書寫山水花卉皆具雅韻國雅集稱其詩才情
溢出似孫策渡江老宿爲之辟易凝翠亭云亭收眾壑
陰積翠落檐深迸水晴飛雪回風香滿林穿雲閒洗盃
選石坐彈琴隨意行歌去階前見虎心題顧眉生畫蘭
云半幅雙鉤楚澤春南朝舊部總傷神蘼蕪詩句橫波
墨都是尙書傳裏人上有柳如是題句也蘼蕪柳小字
晚知泰順縣作修船謠恤民役尋以老病乞歸時康熙
乙未有兒童失學田園廢也算從官一度回之句樊榭

送其歸宛陵詩歸去宣州七月初蕭然行李意何如官
身已謝潘懷縣眞散應同陶隱居稍待西風看雪稻更
聞春網薦琴魚修船謠似春陵作此日雲山不負渠琴
魚卽藥祖魚耦長田家桑落酒風物藥祖魚句嘗爲漁
洋所稱

孝感夏無易教授熙臣七歲補諸生詩才富贈施州衛
寄所親云環衛皆君長東南盡竿叩流官乘小駟蠻婦
置花寶刀劍生畦背衣冠列附庸不煩司馬檄尺土亦
王封跋涉皆天意艱難未敢辭地傳巴子國人拜竹王
祠山水多奇氣煙雲無盡時更兼旬日雨得不賦秋悲

唐施州屬江南黔中道五代屬蜀宋屬夔州路明省州
入衛屬湖廣都指揮使國初因之雍正十三年陞爲施
南府

國書之作與等韻合始制字者達海榜式額爾德尼榜
式皆謚文成嗣後稱善譯者以徐文定爲最文定字善
長號蝶園舒穆魯氏舒與徐滿音略同而字義亦近故
天下稱蝶園徐先生剛介負義不苟隨人可否癸丑成
進士與容若同榜明珠屢招之不一往乙卯散館索額
圖惡其不附已奏改戶部主事再遷至侍講選講官與
同官德格勒故相善德格勒善言易會天久不雨

聖祖命筮之遇夬曰澤上於天將降矣而卦義五陽決
一陰小人居鼎鉉故天屯其膏決之卽雨
聖祖愕然曰安有是以明珠對明珠聞而大惡之並及
公尤深疾湯文正會文正議董漢臣止書事明珠誣以
怨訕並言二人與之結黨乃召諸臣試乾清宮有旨譙
讓二人命同試者校勘其文眾相視無言文正獨右二
人旣罷詔以文正輔導東宮文定教諸皇子明珠使
人謂公此非福也惟歸誠於執政或少安公不答二十
六年冬德格勒坐私刪起居注論死赦出謫科爾沁事
連公下獄免死入辛者庫時索已挫於珠久之珠亦落

職家居事漸解壬午復用爲內府員外郎累遷內閣學士出辛者庫五十三年出爲浙江巡撫五十七年授兵部尙書老而好學與方望谿共事蒙養齋時相考問

憲皇帝御極諭曰徐元夢乃同學舊翰林康熙十六年以前進士止此一人因賜以詩有常懷舊學窮經史更想餘閒力簡編之句雍正元年署大學士改戶部尙書八年以在浙失察呂留良案落職乾隆初再起用卒年八十七其秋日郊行云偶因尋客去騎馬出青門落日銜千樹寒流抱一村田家收黍稷場圃散雞豚父老驚心目將軍獵騎繁送隨義文出塞云君到居庸北應憐

一雁回沙平疑地盡山豁訝天開落日重關閉秋風萬
馬來勉旃從此役莫上望鄉臺再送義文云兩出居庸
塞憐君多苦辛風沙隨去馬雨雪滯行人地濶居民少
天寒部落貧須知柔遠意率土盡王臣登三屯鎮城樓
云雉堞連山起登臨亦壯哉一聲南雁去萬里北風來
苔沒前朝碣雲寒上將臺興亡無限意尙想濟時才

吳漢槎以雋才戍絕塞納蘭容若力贖以還而館之歿
復爲之完其喪世高其義詩有開元大歷風格秣陵懷
古云山色江聲久寂寥十三陵樹晚蕭蕭中原事業如
江左草色何須怨六朝較龔孝升興懷何限蘭亭感流

水青山送六朝有過之無不及也其淥水亭雜識有論
詩語今摘錄數則唐李益贈盧綸詩云世故中年別餘
生此會同卻將悲與病獨對朗陵翁盧和云戚戚一西
東十年今始同可憐風雨夜相對兩衰翁句律悽惋如
出一口張繼在臨川寄皇甫冉詩云京口情人別久揚
州估客來疏潮到潯陽回去相思何處通書以上三句
見下一句別是一體冉答之云望望南徐登北固迢迢
西塞望東關落日臨川問音信寒潮惟帶夕陽還不但
格律與之相埒而一時相與之情亦可想見王建宮詞
太儀前日暖房來屬向昭陽乞藥裁教賜一科紅躑躅

謝恩未了奏花開
今人有遷居或築室朋儕醵金往賀
曰暖房蓋自唐人已
有之丁鶴年西域人
洪武初回回人禁例
甚嚴行止皆不得自由
丁嘗有詩云行蹤不定
梟東徙心事惟隨雁
北飛劉伯溫家居危疑
九日詩云薏苡明珠
千古恨卻嫌黃菊似
金錢其意皆可傷也

客若臘月十二日生
高澹人有摸魚兒詞
云小闌干早梅初破
紙窗微逗香縷冰輪
似水霜輪淨遙想玉
門關路憑記取向雪
後衝寒一片玲瓏樹
歸來歲暮把衣卸盤
雕簾垂銀蒜款款夜
深語年光近又被春
禽喚曙匆匆凍臘將
去牙香繡袋渾閒事
那比蠻箋鈿柱驚節
序

恰十九東坡十二君初度酣餘起舞擬譜鶴南飛尊前
狂叫側帽睨今古卒於康熙乙丑五月年三十有一姜
西溟輓詩云侍從張安世名家晏小山承恩惟宿衛適
意在花閒客至同開卷朝回只閉關心期如有託寂寞
去塵寰吳蓮洋詩十載曾聞幼婦詞願將銀管寫烏絲
愁當鸚鵡爭傳處痛在玲瓏再唱時舊譜漫教蟲網遍
閒情空有笛人知從今錦字休零落一認弓衣也淚垂
通志堂集附錄挽詩九十九首惟此二首爲可誦

趙秋谷爲孫文定公孫壻康熙戊午年十七以第二人
舉于鄉明年捷南宮登館閣天才駿厲俯視儕輩國子

生錢唐洪昇以詩詞游公卿閒應莊親王世子之請作
長生殿院本京師多演習之秋谷尤所咨賞會國郵止
樂大紅小紅已浹日而纖練未除顧置酒大會名流畢
集忌者拮據入奏徧及同會秋谷至考功獨以自任在
座者各譴謫有差而秋谷遂坐是削籍年曾未三十也
其還山集寄昉思云垂堂高坐本難安身外鴻毛擲一
官獨抱焦桐俯流水哀音還爲董庭蘭又嘗有絕句云
牢落周郎發興新管絃長對自由身早知才地宜江海
不道清歌誤卻人徜徉林壑垂五十年乾隆九年卒年

八十三

曹棟亭讀洪昉思稗畦行卷感贈一首兼寄趙秋谷宮
贊云惆悵江關白髮生斷雲零雁各淒清稱心歲月荒
唐過垂老文章憂思成禮法世難拘阮籍窮愁天欲厚
虞卿縱橫捭闔人間世只此能消萬古情棟亭弟子猷
名宜善畫閭百詩贈詩云骨肉誰兼筆墨歡羨君兄弟
信才難南臨淮海熬波遠北覲雲霄補袞寬坐嘯應知
勝公榦暮歸還見服邯鄲請揮一匹好東絹怪石枯枝
卽飽看棟亭題畫詩一段寒江魚網水空簾看到日斜
時亦通畫理

劉玉衡葛莊詩出入於香山劍南之間新昌縣云民窮

瓦屋少縣小石城堅西山卽景云野寺無名惟見佛空
山有路漸知村武林喜晤張中丞敬止賦呈云欲抽身
處何曾老未罷官時已覺貧秋懷云生來多病宜蔬食
老不禁涼換袂衣雪後答張山人云疑是身居挂月邨
卷簾殘雪照芳尊灞橋非負尋詩約爲有梅花不出門
其雜志四卷雜記見聞論者議其頗譽己詩似張表臣
珊瑚鉤詩話錄凡仙詩十五六葉太近夷堅志然亦閒
資考證也

佟儼若與梅堂集送李文海云雨中荷滿城根路塔上
鐙昏寺外船寄呈彥公表叔云獨院梅花涼夜雨數行

家信小樓鐙贈孫豹人云老年有恨詩爲泣半世無家
酒可依贈退思云荒城乞米依僧住老屋搖風縛樹支
儼若尙書國正子以蔭謁選得臨賀調思恩五年而卒
年四十二懷寧蔣老客瑤芝有佟退之之任臨賀約余
同行詩退之卽儼若其桂林雜感云獨秀山前端禮門
興亡人說靖南藩千尋蔥嶺梵王座一炬咸陽高帝孫
箐黑射來秋殿月廊虛夜出鬼娃魂更看死難孤雛嫁
都尉安西不忍言此詠孔定南事康熙九年李定國攻
陷桂林定南死節女四貞適孫延齡以撫蠻將軍駐廣
西叛降三桂四貞勸其反正十五年三桂誘殺延齡四